

Paris ed ils scolars dil Center da formaziun Surselva (CFS/BZS)

Ils scolars/las scolaras dalla secunda e tierza classa dalla Scola media propedeutica (F21/F22) han giu la schanza da visitar il marcau dalla carezia, Paris.

L'entschatta mars 2024 essan nus 17 scolars/as e quater scolasts/as parti cun tren dalla Surselva muntagnarda entochen Paris. A Paris havein nus retratg in grondius albiert per la giuventetgna.

L'emprema viseta el fascinont marcau da Paris ei stada il Sacré Coeur sur Montmartre e quei duront la notg. Naven da quella gigantesca baselgia havein nus admirau igl entir marcau. Nus eran ils sulets turists, per nus in mument impressiunont e quasi nunver. Il proxim di essan nus spassegiai sper la Seine ed havein contemplau il plazzal da reparatura dalla catedrala Notre Dame. Era havein nus visitau la legendara biblioteca da Shakespeare and Co.

Tut tenor direcziun da studi (differentas gruppas da lavur) essan nus lu semess sin vias differentas. La gruppa da pedagogia ha giu la pusseivladad da visitar il Musée d'Orsay. Quei museum d'art era avon 100 onns ina staziun da tren, denton oz ei quella staziun in museum e zuar in dils pli impurtonts da Paris. Leu havein nus contemplau bia maletgs impressiunonts ed interessantas sculpturas da Monet, Van Gogh tochen tier Rodin. La gruppa da sanadad ha igl emprem visitau la secunda pli gronda tuor da Paris, la tuor da Montparnasse. Quella ha purschiu a nus ina graziusa e fantastica survesta dil bi marcau.

Il program da suentermiezdi ei staus las catacombas. Las catacombas ei igl ossari dil marcau, il qual sesanfla ella cava da crappa sutterrana. La contemplaziun da tut quell'ossa e cavazzas ha surpriu nus e creau in curios sentiment. Malgrad quella exposiziun havein nus giu la sera in appetit tut aparti.

Il tierz di havein nus visitau danovamein il quartier artistic e quella ga duront il di. Tgei plunas turists, tgei canera e tgei hardumbel! La gruppa da pedagogia ha silsuenter visitau ils museums "Centre Pompidou" ed il "Musée de l'Orangerie". Cunquei che nus havevan gia duvrau bia da quels maletgs sco inspiraziun per ina lavur artistica en scola, eis ei stau fetg interessant da veser nos maletgs ella realitad.

La gruppa da sanadad ha medemamein visitau dus museums. Numnadamein ils museums "Galerie de Paléontologie et d'Anatomie Comparée" e "Musée de l'Homme". Quels dus museums han dau novs impuls a nus. Naven dalla historia dil carstgaun sco era dils animals entochen tschurvials da creaturas presentai realmein. Tgi havess tertgau ch'il tschurvi d'in crocodil seigi aschi pigns en cumparegliazion cun siu tgierp?

La sera essan nus i tuts ensemen viers il pli famus liug da Paris – la tuor Eiffel! Scalas e scalas han menau nus ell’altezia, e pli ad ault che nus mavan e megliera survesta ch’ins haveva. Per certins ei l’altezia stada in problem e quel havein nus sligiau cun cantar ina canzun romontscha. La rendida dil sulegl sur Paris ei stada u biala! Puspei turnai al pei dalla tuor eis ei vegniu stgir, mo il sbrinzlar dalla glisch ei stada magica e romantica. La fomaz ha surpriu nus ed ils burgers han cuntentau in e scadin e silsunter havein nus durmiu sco tais.

Nossa davosa staziun ei stada la Défense e quell’ architectura fa fetg endamen ad ins il grond marcau da New York. Pli tard essan nus semess sin via tier la “Fondation Louis Vuitton“. Medemamein in’architectura impressiunonta e per certins in smarvegl absolut. L’exposiziun interna dil renomau artist Mark Rothko ha incantau nus nundetg. E suenter museums, maletgs, architectura e sculpturas essan nus tuts semess sin differentas vias per explorar Paris independentamein. Certins han visitau la casa digl artist Rue Rivoli, auters igl Artg da triumf. Auters ein stai sin ina barca sin la Seine, il flum da Paris, ni visitau la casa da cumpra Lafayette.

La davosa sera a Paris havein nus passentau comunablamein e consumau specialitads da Paris. Turnond en nies albiert, haveva casualmein in “open mic“ liug. L’entschatta havein nus mo tedlau tier e gudiu l’atmosfera. Tec a tec havessen giu queidas d’ir sin tribuna per vegnir en fuorma. Dus da nossa gruppa han cantau denter auter canzuns d’ABBA, ils auters han susteniu ed applaudiu ils cantadurs. Ensemen havein nus passentau ina bellezza sera. Paris ha fascinau nus nundetg ed aschia era ei gia temps da returnar. Il viadi a casa ha menau nus danovamein ella realitad, el mintga di da lavur/scola.

Senza nos marveglius scolasts che han accumpignau e possibilitau a nus da visitar Paris, fuss quella jamna stada mo miez aschi miraculosa. Sco gruppa lein nus engraziar a nos scolasts e nossa scolasta (Remo Alig, Pablo Winzer, Marionna Fontana) e naturalmein era a nossa stimada secretaria (Nicole Stiefenhofer).
Merci et au revoir!

Text d’Isabel Anjo e Nina Camenisch, scholaras dalla F3, scola media propedeutica, Glion